

續金華叢書



續金華叢書



柳待制文集卷十一

續金華叢書

墓誌銘

義方陳母丁孺人墓碣銘

并序

建安陳湔衰經踵門以謁自通於予予出與成禮退詢其故湔再拜起涕泗言湔喪母踰年哀未卽死圖終窆窆之事今旣卜得日湔之同門友蔣易實爲湔謀所以不死其親者曰易次而母諸行往求柳先生銘先生樂稱人之善其將有以假寵於而母矣湔持是而來惟先生之昇矜之也嗟乎予文詎能使而母昭昭於地下雖然起孝之志予其忍重違之按易狀孺人丁氏諱臨字淑道世籍建陽之嘉禾上里父諱澄號稱里長者孺人幼慧讀論語孝經孟子識其大意古入文字經目輒成誦處室時嘗學和詩伯父縣丞公戒曰婦人職知婦道詩非所宜習蓋終身服之不敢言文年二十四歸中里陳君騰實君故仕宦家子又早孤時經喪亂橫賦重斂日暴月尫君素濡弱常破產應之家遂以削孺人入門檢括內計盡得孔隙曰此豈猶不

可爲乎稍出其智補窒罅文芟除蒼翳永久而生道裕如閱十三年
君卽世孺人益自力于儉勤躬操簿書手執算籌雖一錢一孔之出
入必使節葉可尋而根株可以覆按廣田疇新室廬諸凡潤飾先業
有男子志慮所不能及者孺人子男四女一喪父時長纔十二而季
猶未睟稍長入小學闢塾曰義方堂延名師就講肄暇日則歷舉小
學書立教大指示警厲於諸子而怡怡奉親長不敢生驕易之句又
常常語及之他日子知博習女知順從人以爲義方之教然也孺人
質敏而惡華簪珥服御不競妍好晨興坐堂理家政問繇賦問米鹽
言人人殊而出語應之各中肯綮或時過午食不下咽僮隸意其倦
且休矣而區畫彌密滋無惰容大抵治家整肅內外斬斬踐其庭者
見其左蹈規矩右循繩尺而和氣充物淫慝自無因而入也陳氏族
盛宋中興來常有顯者今浸遠浸湮里中尙五十餘室孺人禮其尊
老而慈其卑幼往來問遺無愆節戚疏少長無間言比歲丙申丙午
薦饑里民艱食孺人旣爲粥以活饑者又下粟估稍賑卹其未阡于

危者病不能謁醫亦隨證注善藥予之曰毋庸使他人知其施實德于鄉鄰固如此孺人嫠居三十年貞節潔行足以表見于世里耆聚謀方欲列上其事請加旌復書適具元統二年正月朔晨起焚香誦道釋經已忽覺體中小不佳就寢而疾作禱醫勿效子湔竭誠露禱刲股和糜以進亦輒勿效更十日卒得年六十又五子曰泖曰澧曰涓曰湔涓早卒女和適崇安詹天增和先一年亦卒孫男五元燾佛僧元亨元泰元顯孫女六初君之喪孺人爲卜藏室甫葬而涓天徵之堪輿家言咸謂不利及三改卜兆域始宜孺人曰亡者得安其靈則生者宜有蔭藉費雖巨吾敢屑較之哉凡甕窆而封陳牲而虞肅賓製服飭具每益謹已又曰陰陽拘忌爲人子弟亦所宜知命泖因傳其書爲其學焉於是泖所從授書者章貢劉君某復來爲孺人謀相墓得某山之原維食卜用某月某日鑿龕某月某日掩坎卒之明年也易之狀曰易狀孺人之行得于宗老之賢者皆不謀同辭吁信然矣曩易從杜先生武夷概論節婦之被旌門者先生曰使世之公

論不屈而有賢守令者出則若陳氏母之操行風節自當表而上之不然旌復之令何爲者哉孺人已矣亦徒以重夫君子感今思古之情予是以序而系之俾俟持歸請先生書而表諸墓上倘萬一遭人之采焉則孺人之成教遺範猶足以衣被來世而陳氏之不遂泯泯者庶其有在于是銘曰

遭家孔艱亟返之安其智間生日以遂養日以備殞於中世有子有孫宜于其家相維斯丘不亢不污高四尺者孺人墓耶

澹居處士馬君墓碣銘

馬氏望扶風而再徙于南者惟新定新亭之族尤衍以碩禮部尙書公諱大同以政學顯宋淳熙間與紫陽文公實交相引重詩書之澤洽于孫曾雖所資所藉有淺有深大抵郁如也尙書伯兄諱大方六世得澹居處士處士字之純字希文卒以至順元年閏七月乙巳春秋七十又六葬以明年二月某甲子兆在孝行鄉之望雲原前葬嗣子恭命族子瑩爲書一通著其行業卽請于所善東陽柳貫銘而琢

諸紼纚之碑貫幸嘗執筆隸奉常職在誅行而考辭諷事又知處士
爲厚德長者可銘不誣乃系而銘之處士夷靖簡亮人也讀書務明
體要不爲章句繳繞視世俗豪攫智籠之術如疾狗偷舛羨黜浮自
致饒裕然聞里黨間有一義可爲奮勇赴之不誅不撓至元中有司
嘗征商於野民甚病焉處士持牒愬行中書以爲與民爭利非盛世
事卒覆按除之大德丁未歲大祲處士傾廩以餬餓者掩骼以從禮
制或欲上其名應出粟補官之令則厚謝曰吾知盡吾力敢微賞哉
處士仲兄早卒鞠其子如己子子尋卒鞠其孫孫又卒鞠其曾孫葬
祭以禮婚娶以時植其門戶如初處士聚書至數千卷畜古今法書
名畫亦數百軸花時菊景潔觴陳俎從賓客歡賞引滿徑醉蓋歲歲
常然將死語子若孫曰吾無愧于人人亦無憾于吾卽就不安焉耳
訃聞閭居野處之夫咸曰善人已矣吾將何賴處士之配董氏亦有
賢行卒先一年今舉以附其域處士無子以伯兄之子後命族子諱
銘者也孫男二禮禔孫女一尙幼處士之曾大父諱崇大父諱鎔父

諱熙孫皆隱德弗耀曰澹居云者處士所自命也處士嘗患里中子弟爲聲利塗塞耳目思一洗濯新之方將割田闢塾致明師宣昭經誼以大變其俗而竟齋志入地嗚呼怫哉處士之有蘊不試者如是是足以表世熏後矣可無銘乎銘曰

士非盜名禮可求野不有耆碩孰起淪謝君子尸之適觀大雅今其亡矣有不亡者紹聞德言以祭于社相維斯丘孫曾受嘏

故平陽州判官陳君墓誌銘

釣臺書院山長陳士貞過貫泣拜言曰我先人早自奮於仕道淹回州縣餘廿年方累聖繼明惠綏臣下推恩進秩便蕃優渥而疾病侵凌薄于旣耄卒以不偶死今墓艸幾宿而隧間之石未有刻辭夫子蓋嘗辱交焉倘幸假茲鄉曲之誼男之一言則先人有知將不悼其堙鬱於土中也貫旣拜而受言則退考鄉貢進士吳萊所爲事述撫其可書者序而銘之序曰君諱遠大字宏父姓陳氏陳氏本出彭城中世南徙占籍于婺之浦江鄉曰德政自君始又徙縣東北之興賢

鄉村曰某村君少從鄉先生學治經爲尚書大義下筆無留思然好
倜儻之畫策慨然欲有所爲於時會邑里初內附山谷獷強猶蜂蟻
聚負固弄兵間則出相寇攘君曰吾其有以自效卽釋儒服去從軍
首建購捕之方次陳綏靖之略凶渠旣得餘孽悉平幕府上其功而
君亦隨計至京師得試將仕郎辰州路施容州判官未上而隣土有
警郡復檄君至麾下資其智勇多所俘獲大帥府材君之爲而惜其
棄之遐陬復剡上之意將引以自近久乃改全州路清湘縣丞在官
八年稍進從仕郎贛州路信豐縣尹轉承事郎温州路平陽州判官
于是君累官嶺海間風淫露毒之所襲腰腳痺弱不良于行曰吾老
矣不復有四方之志矣因自免歸題其宴坐之室曰達觀幸賓客至
則命豆觴諧笑從容連日夕猶儒生故態也蹕蹕勃窣居十二年泰
定三年六月廿四日卒得年七十九清湘介湖北窮徼谿蠻峒獠錯
居其壤山有毒蛇儲之爲蠱以中人立死而獄多蔓辭君曰戕人以
售其妖此宜犬豕弗食可少貸之乎悉論寘于法撤淫祠魔菴又數

十區取其材瓦葺新學官曰此教基也庶幾使民知所以教時方有事交趾全當空道餽餉所出他官屬或畏難遁去徵發調送郡獨倚君以辦顓有廢縣龍南居獠中而以其地隸信豐南安萬戶府蓋僑處其縣官命分卒爲六屯使耕龍南曠土自食其力以備捍禦久之招納亡命橐籥姦私民甚患之而未有以愬也君列上其事請復置縣從其軍蓋按覆數四而卒無以易君之議焉君之政大抵皆可紀而狀君之行者徒以士貞之能言者筆之書則夫士貞言焉而不及者尙多有之雖以予之知君而不敢溢于辭懼非傳信之義也君之先配黃氏先君卒今配林氏治家得母道甚子男二長士元梧州路儒學正早卒次則士貞女二婿曰倪鉅戴樛孫男三佑僖倫孫女三未行曰夔曰文煥曰德潤君之曾大父大父父也大父嘗以登仕郎自試入官而未及仕君之葬其地巖塢距家一里君所自卜天曆元年十一月朔葬之日也自君病廢臥家以及于死迄今未廿年而鄉鄰之後生晚輩已無有能言其歷官行業之詳者矣使更閱數年則

君之與存者幾何哉宜士貞求文表著之意汲汲焉而不敢後也然則古之以功業自見而恃文以傳者亦若是而已寧獨君哉銘曰

智名勇功所謂達財隨而有獲繫乎時哉昔君用壯直奮無回乘于艱屯仕道以開轉丞試令績用恢恢駕車橫陽有沃西來孰挽而行孰輒而摧歸承燕休終于耆台巖塢之丘封樹每每相爾嗣人視崇思隤凡物之生有覆有培人胡不然自戕其枚吾銘爾貽併泄爾哀

盧氏母碣銘

盧氏母杭州城東人徐姓諱妙安歸里中盧翁翁業坐肆販繪母常佐之操奇贏聯什一稍稍致饒裕而儉順之化行于其家穆如也生男女一女適徐永亨男德恆治岐伯倉公鬼臾區言爲疾醫里人詣門求察脉無論富貧貴賤率與善藥士大夫稱之初德恆兒時行戲市中得道棄佩刀攜白母母變貌切責曰是豈無主物哉曷不待其還求審而歸之爾未成人已自利如是吾安望爾怒經日不解德恆自少卽知分別義利母教實然也泰定四年母年七十七疾旣蹙語

德恆曰汝能盡子道已惟當盡人道則吾死其無憾又瞑目語諸孫曰勤讀書勤讀書語未終而逝二月十日也德恆買美槨爲櫬具襲衣爲斂治喪制服壹遵禮經踐雨風涉濤江行求塋域岡阜間兢兢惴恐若或失之如是三年得錢塘縣定山范村之桐樹塢相墓者曰宜卜兆者曰吉乃以至順二年十二月庚申奉匱卽窆之明年將植碣表墓請予銘而刻之予惟杭故俗家有喪用浮屠老氏之法建壇場設齋祠歌唄作樂越月踰時舉匱昇之炎火拾燼骨投之深淵燕娛娛賓費數鉅萬以此相高漫曰吾不儉其親矣萬有一能營隲地湖山左右琢雕刻鏤爲墓治隧又不過夸盛強飾觀遊往往艸未再宿而已夷爲平陸其悖禮違義日趨于薄于愛親乎何有今德恆卓然拔流俗推其自盡之心成是因山之禮地不愛寶龜不秘智是開佳城以封以樹則夫致吾之孝以盡人之道固足以蔭藉其子若孫矣翁諱華卒先十二年年六十八其葬徐村距桐樹塢數里而近孫男四浩澄杏子婆留孫女一德恆字仲庸治生厚交不爲市道庶

幾柳子厚所稱長安藥市宋清者予每資其液齊以爲衰莫之防焉
乃不辭而與之銘銘曰
生則有養不覲其豐死則有藏不要其隆前林後岡涵和葆冲是盧
母阡首世維宗

圓一道人墓碣銘

并序

圓一道人爲老佛之學得其玄微而不滯于名相所謂遊方之外者也
道人願身廣頰疏眉秀髯常所戴履艸冠繩屨而已然其風神曠
朗人望之如古仙劍客性嗜遊名山水在數百里間一筇徑造興盡
卽還居鄉不爲崖異而視世人用計巧取之術疾之甚于狗偷道人
世居建之浦城諸祖以上皆有仕籍于宋族故大也旣冠而遭兵燹
間關離析獨幸與其母能出萬死一生中早暮調適旨甘節時燠寒
曰吾有母在它無恤焉蓋沒身孝養彌篤中徙縣東鄉泰寧里耕稼
樵漁外託興吟嘯言皆根理天曆二年其歲己巳春秋七十又二以
疾卒家九月十三日也明年至順元年正月某日葬大嶺下瀆原合

于其配鄧氏之窆初道人無子已而有子其養子曰鐘嫡子曰鉉女
二皆嫁里中人孫男四曾孫男二道人諱玉成姓李氏自號圓一翁
又別號翠陽子祖諱源父諱櫟皆業儒道人葬後一年其方外友盧
一先生趙君嗣琪自京師來錢塘爲予言道人事業行治如此請予
銘其隧予聞莊周言去智與故故無天災無物累無人非無鬼責若
圓一道人庶其似之矣爲銘使刻置隧上銘曰
以知養恬而遊于玄生不百年樂哉其天

夷門老人杜君行簡墓碣銘

并序

至元大德間儒生學士蒐講藝文紹隆製作禮樂之事蓋彬彬乎太
平極盛之觀矣然北汴南杭皆宋故都黎獻耆長往往猶在有能參
稽互訂交證所聞則起絕鑒于敗績殘楮之中寄至音于清琴雅瑟
之外雖道山藏室奉常禮寺亦將資之以爲飾治之黼黻若予所識
張君君錫杜君行簡則以汴人而皆客杭最久于時梁集賢貢父高
尙書彥敬鮮于都曹伯幾趙承旨子昂喬饒州仲山鄧侍講善之尤

鑒古有清裁君每上下其論議而諸公亦交相引重焉延祐初朝廷
首起君錫爲大樂署丞將次及行簡而君錫死又數年行簡亦死士
論盡然歎詩樂之不復振矣行簡杜氏諱敬其字行簡世居汴城中
祖亨嘗有官勲父民鑑卒湖南道宣慰副使行簡自幼器識凝邃不
與凡兒徵逐爲嬉戲事稍長學成研窮律本分別音節悲憂愉快概
發于琴晴朝月夕人境俱勝觴詠方適促絃鼓一再行巖溜清而晚
蘭潔也學其學者其抑按吟採皆有指法可傳行簡善書蓄古名人
墨迹歷代金石刻甚富然爲好事者持去亦無係吝性嗜酒客至傾
壺倒榼盡醉益歡行簡少嘗以禮部令史從尙書柴公奉使安南還
辟廣西帥府掾江淮行省又嘗署人匠提舉司都目江陰榷辦官皆
以不屑意未移時棄去大冠長裾優游湖山文酒間晚自稱夷門老
人得年七十而終泰定元年十二月二十二日也其配李氏里中大
姓女婦德母儀旣順而恭卒後八年年若干子男二士元士謙也士
元南臺察院書吏士謙浙東廉訪司書吏皆以儒貢孫男五孫女二

俱幼士元士謙將自杭舟載其二柩歸卜汴南三家店之塋以泰定四年某月某日就窆先事以狀請于東陽柳氏曰吾翁早從南北賢大夫士遊竊常有考于藝文之事時非不偶而身不一試不肖孤行能之未著名譽之未立也卽葬而無刻辭于隧其何以昭示來裔子幸哀而予之銘焉昔予與吳君錫京師有誄今行簡以禮葬銘烏乎辭銘曰

道和德順溢于聲雅南一濫琴孤鳴徽以白玉絃朱繩五音二少濁變清杜氏于琴若天成使和其音薦神明豈不爲世躋隆平江湖遙夜占隕星鑒亡絃絕秋風驚夷山萬里開佳城魂兮歸來其永寧

元故太中大夫海道都漕運萬戶周公墓誌銘

并序

海道都漕運萬戶周公以元統元年十二月七日卒官明年正月十有七日自吳郡買舟載其柩北還還用四月十三日葬所居鄉張寺里先塋之次其配汝南郡夫人王氏戒其子宗衰經泣拜請銘昔予漫仕與公同朝及考鄉進士試上京公爲留守判官迨今西遊而公

持漕節于吳每見益歡辱與之遊蓋餘二十年銘非予誰宜爲公諱
仲字信父衛之汲縣人曾祖諱祥金忠勇校尉步軍將官祖諱泉以
公貴贈亞中大夫衛輝路總管輕軍都尉追封汝南郡侯父諱麟累
贈嘉議大夫禮部尙書上輕軍都尉追封汝南郡侯公少警敏稍壯
得推擇爲山南淮西二道廉訪書吏貢補吏部令史由樞密院掾爲
中書左司掾考成擢兵部主事建德路總管府推官崇禎院都事工
部主事中書省檢校官進工部員外郎稍遷上都留守司判官兼本
路都總管府判官兼推官出爲河南江北等處行中書省理問官揚
州路總管改漕運萬戶歷十官皆不俟終更而惟建德推官未嘗上
階自承務郎七遷而至大中大夫食正三品祿終其身公以文吏自
奮于刀筆間挾通敏之資而達之于用應事制變他人首鼠不決公
徐出片言裁其過甚而彌縫其缺失無不動合樞機揚州之政不隨
不激人尤樂稱道之與人交惻惻無華久而彌親故其死聞者盡傷
得年七十元配王氏先卒封汝南郡夫人男宗後配王夫人出也女